

Noticia
Transparente
di Gobierno

ISLA ONLINE

Dialuna 16 December 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



Gabinete Wever-Croes



GOBIERNO DI ARUBA TA CUMPLIENDO CU TUR NORMA STIPULA PA LEY, DEN E PRESUPUESTO 2024

"Esaki ta e resultado di maneho financiero prudente y responsabel cu Aruba a pidi p'e y cu Aruba merece"

Dialuna mainta durante e reunion den Parlamento, na unda a trata e presupuesto supletorio 2024, Prome Minister Evelyn Wever-Croes a indica cu momento cu logra e sosten di Parlamento, e ciclo presupuestario 2024 ta completo, y no tin un manera miho pa cera, cu ta cu un "broche di oro". Manera ya a wordo indica, e presupuesto a wordo aproba na tempo, despues a aproba e "voorjaarsnota", y awor a bin den Parlamento pa busca aprobacion pa e ultimo cambianan cu ta den e "najaarsnota". Prome Minister a expresa cu e proceso encamina ta demostra cu Gobierno ta respeta Parlamento, y p'esey ta trece cambianan den e presupuesto pa wordo aproba prome cu uza e placa.



Prome Minister a indica cu e presupuesto entrega ta cumpli cu tur norma, cuminsando cu e surplus cu ta 2.3% enbes di 1% manera ley ta stipula, y esaki ta bin di e crecimiento economico di pais Aruba cu ta poni na 8.5% y 10% pa Banco Central.

E di dos norma di e presupuesto cu ta angra den e ley di Laft ta cu e debe di pais Aruba tin cu baha na 70% na aña 2031 y e mester ta na 50% na 2040. Pa aña 2024, e debe ta na 71% caba cu ta hopi bon mirando cu ta 7 aña prome cu e tin cu yega 70%. Esaki ta muestra cu Gobierno ta cumpliendo cu e normanan stipula pa ley.

E di tres norma ta e "personeelslasten norm na unda nos tin cu yega 10% di GDP prome cu 2027, y ya awor e ta bou di 10%. Pues cu esaki ta muestra un biaha mas cu Gobierno ta cumpliendo cu e normanan.

Prome Minister a splica cu tin un diferencia di opinion cu CAft, mirando cu nan kier pa Aruba paga mas riba e debe. "Pero nos como Gobierno y como ciudadano di pais Aruba sa cu nos tin cu inverti den e pais, y p'esey e aña aki nos tin 69 miyon florin aloca pa inversionnan publico. CAft no ta bisando cu Gobierno no ta cumpliendo cu e normanan, pero kier pa enbes di inverti nos paga mas riba e debe pa asina caba mas lihe. Si Gobierno haci esaki, no lo inverti den careteranan y casnan di cuida.

Cu esaki nos ta creando espacio financiero cu Aruba mester, no solamenete pa inversion pero danki na e maneho aki tin espacio pa duna bek na comunidad, specialmente na esnan mas vulnerabel, manera e "gehandicapt uitkering" cu e aña aki caba a subi cu 130 florin, y cu lo sigui subi e añanan nos dilanti. Mas subsidio na fundacionnan pa asina nan por yuda esnan den necesidad, pensioen di AOV cu a subi caba ultimo 7 añanan aki cu mas di 400 florin y lo sigui subi na un forma responsabel mientras e fondo ta duna espacio. Esaki ta e resultado di maneho financiero prudente y responsabel cu Aruba a pidi p'e y cu Aruba merece", Prome Minister a expresa.

Gobierno ta logra surpasa percentage di surplus di 1% cu ley ta prescribi

PRESUPUESTO SUPLETORIO 2024 A WORDO

APROBA CU UN SURPLUS DI 2.3%

"Nos mester keda cu e optimismo y e fe cu nos bon Dios tin cosnan grandi pa Aruba"



Dialuna mainta Prome Minister Evelyn Wever-Croes hunto cu demas minister di Gabinete Wever-Croes II tabata presente den sala di Parlamento pa trata e Presupuesto Supletorio 2024. Durante su discurso Prome Minister a indica di ta satisfecho cu pa prome biaha den historia un presupuesto ta wordo entrega, trata y aproba na tempo, manera ley ta prescribi. Na Mei 2024, Gobierno a presenta e prome cambionan di e presupuesto y e "voorjaarsnota" cual a wordo trata y aproba pa Parlamento. Mirando cu tin mas cambio, ta importante pa fin di aña bin cu un "najaarsnota" pa asina informa Parlamento di dicho cambionan.

Prome Minister a indica cu apesar di varios cambio e presupuesto a keda cu su surplus di 2.3%, cu ta mas halto di loke ley ta prescribi, danki na e crecimiento economico positivo di pais Aruba. Tambe ta un orguyo pa wak cu e aña aki ta cera cu un "debt to GDP ratio di 71%, danki na e trabou duro di nos profesionalnan, di e ministernan, y di Parlamento.

"Den number di henter conseho di minister, mi kier gradici Parlamento y henter comunidad pa tur e cooperacion cu nos a haya durante 2024. Sigur e aña aki tabata uno cu hopi cambio

pa Aruba na unda cu e pais ta financieramente mas stabiel. Y mi ta sigur cu aña 2025 ta bay ta uno hopi mas miho pa Aruba. Nos mester keda cu e optimismo y e fe cu nos bon Dios tin cosnan grandi pa Aruba. Loke nos mester haci ta uni y sigui traha cu e mesun dedicacion y perseverancia, pa nos logra nos metanan. Cu Dios bendiciona cada ciudadano di nos pais", Prome Minister a expresa.

SINTONISA

CONFERENCIA DI PRENSA DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM

Prome Minister Evelyn Wever-Croes:

GOBIERNO DI ARUBA A HONRA DOS BALUARTE DI NOORD SEÑOR FELIX FLANEGIEN (QEPD) Y SEÑOR CHARRO KELLY (QEPD)

"Cu e desvelo di e borchinan aki, nos ta duna honor na baluartenan cu a significa hopi pa Aruba y specialmente pa e districto di Noord"



Diahuebs 5 di december 2024, Prome Minister Evelyn Wever-Croes tabata presente na un ceremonia na unda a honra dos baluarte di Noord, señor Felix Flanegin (qepd) y señor Charro Kelly (qepd), cu tabata politiconan cu a sirbi pais Aruba dignamente.

Prome Minister a indica cu sigur esaki ta hopi special, mirando cu tur dos politico a fungi den varios funcion, trahando semper na bienestar di Aruba. Señor Felix Flanegin aparte di su carera den enseñansa, tabata diputado y miembro di Consejo Insular y señor Charro Kelly tabata e prome minister di obra publico, y esun conoci pa a pone e fundeshi pa nos careteranan den bario.

Prome Minister a splica cu pa varios aña caba conocirnan y famianan a haci un peticion pa nombra caya na honor di ambos baluarte como aprecio pa tur loke nan a nifica pa e comunidad di Aruba. Sinembargo e proceso aki a tarda, pero danki na e insistencia di Parlamentario Ricky Hoek, esaki a bira un realidad.

Cu hopi orguyo, den presencia di algun minister, parlamentario, famia y conocirnan a devela e borchin na honor di Felix Flanegin cu ta e caya na e rotonde di Plaza Tino Ruiz y Warda di Polis



di Noord bay ariba te na e cruzada di Montaña, y na e mesun rotonde bay pabou pa Palm Beach ta e caya dedica na honor di señor Charro Kelly.

"Cu develo di e borchinan aki nos ta duna honor na baluartenan cu a significa hopi pa Aruba y specialmente pa e districto di Noord. Mi ta gradici tur famia cu tabata presente pa e bunita palabranan, pero specialmente pa presta nos nan casa, nan tata, y nan ruman pa por a traha pa pais Aruba. Pabien Noord, y pabien na tur famia pa e reconocimiento bunita aki", Prome Minister a expresa.





Departamento di Aviacion Civil a atende un reunionnan exitoso na Hulanda

DEN CURSO DI E DIANAN CU A PASA DEPARTAMENTO DI AVIACION CIVIL (DAC) A ATENDE ALGUN REUNION IMPORTANTE NA HULANDA



E prome reunion tabata un reunion internacional di ICAO cu ta regarda e proceso di investigacion di accidentenan aereo. Aki, particularmente, a elabora riba un rekisito nobo cu ta regarda comunicacion cu y e opvang di familiaresnan durante y despues di un desastre aereo. Esaki awor a bira un norma mundial cu Aruba tambe lo mester bay cumpli cune. E intencion ta pa den futuro cercano bin cu entrenamento y proceduranan pa cu e tema aki na Aruba.

E segundo reunion tabata cu e Departamento di Inspeccion di Hulanda ("Inspectie Leefomgeving en Transport") ("ILenT"). Durante e reunion aki a elabora riba diferente manera pa DAC y ILenT fortifica nan cooperacion tecnico, y traha mas estrecho en conhunt. Tambe DAC a firma un acuerdo di cooperacion tocante inspeccionnan di rampa, segun e normanan Europeo di "SAFA" ("Safety Assessment of Foreign Aircraft"). E acuerdo aki ta encera cu Aruba ta forma parti oficialmente di e "network" di SAFA. Inspeccionnan di rampa haci na Aruba door di inspectornan di DAC ta wordo reconoci como ekivalente na inspeccionnan haci na hulanda y tambe tur pais miembro di Union Europeo cu ta forma parti di e SAFA-network. E resultado di inspeccion di avionnan haci na Aruba lo wordo hinca den e database di SAFA, cu tambe ta contene tur inspeccion haci door di tur otro pais miembro di SAFA. DAC tambe tin acceso na e database correspondiente di tur e

inspeccionnan aki, loke ta yuda Aruba pa haci su inspeccionnan mas efectivo y eficiente, a base di data y analisis di riesgo. Aruba ya caba tin algun aña ta haciendo inspeccionnan segun e normanan Europeo di SAFA y su inspectornan ta cualifica caba den e sistema aki. Sin embargo, awor esaki ta keda oficialisa door di firmamento di e acuerdo. Di otro banda, awor Aruba tambe lo ta den posicion pa yuda Hulanda, ora mester, pa haci inspeccionnan di rampa den Caribe Hulandes. Esaki ta ilustra cu e acuerdo aki ta un acuerdo di cooperacion mutuo unda tur dos partido ta beneficia di dje ("win-win"). Esey ta e manera con DAC ta fortificando su mes alabes di cooperacion mutuo cu partnernan strategico.

E tercer reunion tabata e "Vierlandenoverleg" entre e cuater directornan di aviacion civil di e paisnan den Reino, yama "Regiegroep Luchtvaart". E reunionnan aki ta tuma lugar cada 6 luna y diferente temanan di interes mutuo, REGARDANDO tur area den e mundo di aviacion, ta wordo trata. Puntonan discuti ta, entre otro, desaroyonan den aviacion riba nivel local, preparacion pa un eventual auditoria di ICAO, conectividad, aviacion sostenibel, search & rescue, harmonisacion di leyman, intercambio di inspectornan, vuelonan cu aeronavenan sin piloto ("drones"), y mucho mas.

Durante e reunion aki DAC a firma un protocol cu ta encera cooperacion estrecho entre e 4 paisnan tocante supervision riba seguridad operacional den nos espacio aereo. Tambe ta trahando en conhunt riba un proyecto di apoyo pa studiantenan cu ta core stage of ta "studeer af" den e ramo di aviacion. Pa e motibo ey, DAC ta haci un suplica na tur estudiante di Aruba, cu ta studiando especificamente den e ramo di aviacion, cu mester di apoyo pa stage of "studeer af", pa tuma contacto cu DAC na dca@dca.gov.aw.

DAC ta mira bek riba un siman di reunionnan exitoso y lo sigui haci tur cos den su poder pa por garantiza e seguridad y sostenibilidad di Aruba su infraestructura di aviacion civil, mirando e importancia di esaki pa nos turismo. ■■■



MINISTER MADURO A BISHITA E LOCALIDAD NOBO DI ADUANA NA BUSHIRI

Na ana 2026 e edificio nobo di Aduana ta keda cla

Recientemente Aduana a muda bay pa na un localidad nobo na Bushiri cu ta mas amplio y apto pa e trabou Aduanero. Riba Dia di Gracia, Minister Maduro di Finansa a haci desvelo di e logo di Aduana na e localidad nobo y a pasa saluda e Aduaneronan pa gradici nan y desea nan exito cu nan trabou na bienestar di Pais Aruba.

E localidad na Bushiri ta uno temporario, ya cu tur preparacion a keda finalisa pa asina por cuminsa traha e edificio nobo di Aduana na Barcadera cu ta programa pa keda cla den aña 2026.





CONTENTO PA ANUNCIA CU E PROYECTO DI RESTRUCTURACION DI ALTO VISTA TEY CUMINSA



Mi ta contento pa anuncia cu pronto e restructuracion di area di Alto Vista tey cuminsa. Un bunita proyecto unda lo embeyece y crea un miho structura pa e area di Alto Vista. Esaki despues di hopi tempo di dialogo, preparacion y proceso di destaho hunto cu e comision Alto Vista.

Vision tras di e proyecto aki ta pa asina por organisa y mantene e area aki cu tranquilidad y paz pa tur cu ta bishita y haci oracion na e Kapel di Alto Vista.

E proyecto ta encera pa implementa ta lo siguiente:

- Percurpa pa amplia e espacio di parkeo y lo tin un area aloca special pa parkeo, cual diseño lo ta uno den forma natural.
- Lo bai tin borchí indicando reglanan estricto pa personanan duna respet, manera no zonido duro, guia di vestuario apropiá.
- Ta bai agrega un hardin cu flora local panort di Kapel den colaboracion cu fundacion local.

Mi kier a duna un aprecio y gradicimento na nos departamento di obra publico pa diseñá y encamina e proceso di destaho publico, pero mas en especial na e comision di Alto Vista, pa a conseha y guia den e proyecto. ■■■■



Minister Dangui Oduber: APERTURA DI TRYP BY WYNDHAM



Diahuebs atardi Minister di Turismo y Salud Publico, Sr. Dangui Oduber, hunto cu colega Minister Geoffrey Wever, y inversionista sr. Jared Visser a corta sinta pa apertura di TRYP by Wyndham. Tawata un honor y un placer pa Minister Oduber.

Na 2022 Sr. Visser a cumpra e hotel cual tawata opera bou nomber di Brickell Bay Beach Club & Spa. Minister Dangui Oduber a wordo invita e aña ey pa mira e plannan pa e futuro cercano y a ricibi presentacion over di e plan cu Sr. Visser tin pa futuro di e hotel. E tempo ey a cuminsa di biaha cu renobacion di tur e cambernan, sigui pa e lobby area y e pool area cu meta pa por ofrece turista un miho servicio y calidad moderno.

Tryp hotel ta un upgrade completo y sigur un bunita proyecto pa Aruba su turismo. Minister Dangui Oduber ta keda kere den nos propio arubianonan y ta hopi orgulloso di mira con un arubiano awe ta doño di su propio hotel. Un felicitación na sr. Jared Visser y su famia. Tur clase di exito.





MINISTER

Geoffrey Wever

REVITALISACION DI PARKING LOT LAGOEN: OTRO PASO PADILANTI PA ORANJESTAD




Diabierna ultimo, e trabounan di construcion relaciona cu e revitalisacion di e parking lot na Lagoen a ser oficialmente entrega. Minister demisionario Geoffrey Wever tabata presente pa mira e resultado di e trabounan ehecuta.

E parking lot cu un diseño modernisa ta amplia e espacio pa parkeo pa un total di 22 auto y 5 luga dedica pa taxi. Ademá, pronto lo tin charging stations pa autonan electrico. E adaptacionnan aki ta reforsa e factibilidad comercial di e area y ta crea mas facilidad pa bishitantenan y comerciante.

Minister Wever ta expresa su gratitud na DOW y Arubaanse Wegenbouw Maatschappij pa e trabounan di calidad y pa cumpli cu e trabou den e tempo stipula pa limita cualkier strobansa na e negoshinan local.

Cu mas facilidad y accesibilidad, nos ta invita pueblo y bishitante pa haci uzo di e area. Sostene e restaurantnan y negoshinan den e cercania cu nan oferta culinario unico y excepcional, y disfruta di un experiencia Arubano autentico. ■



Minister Geoffrey Wever:

ARUBA TA KEDA E MIHO ISLA DEN CARIBE PA INVERSION



Minister Geoffrey Wever ta anuncia cu pa di 4 aña sigui, Aruba ta e pais mas atractivo pa inversion den Caribe segun Economisch Bureau Amsterdam. E publicacion di Economisch Bureau Amsterdam ta muestra cu pa 2021, 2022, 2023 y 2024


Aruba ta e pais den Caribe cu e clima di inversion mas atractivo.

Desde 2021 Economisch Bureau Amsterdam ta publica e “Caribbean Investment Climate Index” (CICI) den cual ta compara e clima di inversion pa 17 paisnan den Caribe. E size chikito di mayoria economia, e falta di acceso na capital internacional y e dependencia grandi riba importacion ta haci cu atrae inversionnan externo ta di sumo importancia pa nan desaroyo.

Pa 2024 Aruba atrobe ta keda na prome lugar como e pais den Caribe cu e clima di inversion mas atractivo. Como factor determinante Economisch Bureau Amsterdam ta indica e crecimiento fuerte di Aruba su economia.

E analisis aki ta contribui pa Aruba sigui atrae inversionnan externo.

Confiansa di inversionistanan den un pais ta un factor relevante pa nan decision si ta inverti of no den un pais y e publicacion di Economisch Bureau Amsterdam ta contribui pa inversionistanan sigui inverti den nos economia, segun minister Geoffrey Wever.



DARLIN ERASMUS TA REINA DI DANDE NA HULANDA

Den un Event Plaza na Rijswijk basta bon bishita Darlin Erasmus a keda corona como Reina di Dande na Hulanda. Darlin tambe a bai cu e premio pa e mihor cancion di Pasco. Coordinador di Cultura di Gabinete di Aruba Nuris Dabian hunto cu PR di Gabinete di Aruba Sidney Kock a corona Darlin. Na di dos lugar a keda Jersiray Werleman y tercer premio a bai pa Izellah Ruiz.

Na inicio di e festival Minister Plenipotenciario demisionario mr. Ady Thijsen a tene un discurso unda ela cuminsa na bisa cu e ta hopi contento y satisfecho di ta para na Event Plaza pa e Festival di Dande na Hulanda. 'Contento pasobra despues di hopi aña e comunidad Arubiano na Hulanda ta haya e oportunidad pa celebra nan dianan di Fiesta cu un di e tradicionnan mas conoci y respeta na Aruba cu ta e musica di Dande. Un tradicion cu nos como Aruba so tin y pesey nos mester cultiva e tradicion aki y tesora esaki como algo unico cu ta defina nos como Arubiano,' asina sr. Thijsen a bisa.

E mandatario a menciona cu na 2022 Hulanda a cera conoci cu e tradicion aki pa medio di e documentario Dande di Aruba – een bijzondere nieuwjaarstraditie cu a pasa riba prome di Januari 2022 na NPO 2. E documentario di cinematografo Cindy Kerseboom via di combersacionnan cu figuranan importante di Dande na Aruba manera Vicente Ras y Harry Croes dfm a portreta na un bunita manera e tradicion di pa pasa cas pa cas pa duna bendicion pa e aña nobo.

Minister Thijsen: 'Mi satisfaccion ta grandi pa mira cu e aña aki a bin cu iniciativa pa tene un Festival di Dande na Hulanda. Pa hopi aña Festival di Dande tabata conoci di ta worde teni na Rotterdam. E organisacion Contacto Arubano Rotterdam (CAR) pa hopi aña a organisa e festival aki. Mi ta kere cu ta na su lugar pa na e momento aki rindi homenahe na tur esnan cu pa añanan a dedica nan tempo y energia pa conserva e tradicion aki na Hulanda. E evento na Hulanda tabata special pa esnan cu pa algun motibo no por ta na Aruba den e dianan di Fiesta y toch por sinti e calor di Pasco y Aña Nobo,' segun e mandatario.

Minister Thijsen a gradici tur esnan cu a traha duro y incansabel pa e festival por a tuma lugar y a desea tur e participantenan hopi exito. Ela termina su discurso cu entrega di un plakkaat di reconocimiento diparti di Gabinete di Aruba y Gobierno di Aruba na Marcelino Rodriguez pa su aporte grandi pa añanan na Festival di Dande na Hulanda.

E programa a sigi cu e festival mes cu banda di e Dande e participantenan a canta un cantica di Pasco. E conocido cantante Arubiano Lidwina Booi a trece e ambiente di Pasco entre otro cu su cantica classico "Nochi di Pasco". Despues e publico a keda deleita cu un presentacion di Grupo di Betico. Sigur e Festival di Dande e brinda hopi Arubiano na Hulanda e atmosfera di Pasco Arubiano, leu for di cas. ■■■



FERNANDO HALMAN A RICIBI MARCONI OEUVRE AWARD COMO 15 AÑA DJ NA FUNX



Fernando Halman a ricibi Marconi Oeuvre Award for di e conocido presentador di television Humberto Tan. Esaki na ocasion cu Fernando Halman a celebra su 15 aña como dj na e station di radio FunX. Shandra John y Nuris Dabian den nomber di Gabinete di Aruba a presencia e celebracion aki na Amsterdam.

Fernando Halman ta celebra su 15-aniversario como presentado di e show di mainta FERNANDO na FunX. Su programa ta un di e shownan di mainta cu mas largo y exitoso den Hulanda.

Pa celebra e ocasion special aki, FunX a organis un marathon di radio di 15 ora riba 12 di December, for di Melkweg, un lugar hopi conoci na Amsterdam. E evento a inclui musica, cultura y amor pa good vibes. Entre 6or di mainta y 9or di anochi, oyentenan por disfruta di actuacionnan bibo, DJ-sets y hopi sorpresanan.

E amor di Fernando pa radio a cuminsa na 2004 ora ela participa den e programa di BNN Hey DJ. Como un participante sin experiencia den radio, ela logra yega final, algu cu a dune confiansa pa sigui un carer ana radio.

Durante e programa, Fernando a topa cu leyendanan di radio Hulandes manera Ruud de Wild, Gijs Staverman y Giel Beelen. E palabranan di animo ku ela ricibi di nan a motiva su persona pa sigui den e ramo aki. Den poco tempo despues di e programa, FunX-reporter One'sy Muller a invita Fernando pa un oportunidad cu FunX. Den menos di tres aña, Fernando ta presentando varios show y ta gana reconocimiento nacional. Pa Fernando, radio a bira su pasion y su mision.

Fernando tin un capacidad excelente pa deskubri talento. Ela duna un empuhe grandi na carera di artista manera Frenna, Rolf Sanchez, Nathalie La Rose y Sigourney K. Na 2015, ela descubri Frenna durante e periodo di New Wave, anticipa cu e album Francis lo bira number 1.

Su esfuerso pa sostene talento nobo ta bai mas leu di Hulanda. Fernando a entrevista icono internacional manera WizKid y Davido, hasi un gran esfuerso, incluso warda 8 ora den un hotel pa WizKid. Davido mes a gradici Fernando pa duna afrobeats un plataforma den Hulanda. Pa Fernando, deskubri talento no ta solamente un pasion, sino su mision di bida.



Durante di añanan, Fernando a tene hopi dialogo inolvidabel. Algun di e entrevista ku a keda den historia ta:

- 50 Cent: Un combersacion profundo cu e rapper famoso mundialmente riba su vision, determinacion y exito.
- Reina Máxima: Un dialogo intimo tocante su hubentud na Argentina y su vision personal riba finansa, cu a inspira Fernando pa lansa su podcast Real Talk.
- Def Rhymz: Un encuentro honesto ku a bira un documentario di Videoland. Despues di e fayeramento di Def Rhymz, e entrevista a sirbi como un tributo nacional.
- Rihanna: E prome entrevista di Rihanna na Hulanda, poco prome cu ela bira mundialmente conosi. Su determinacion a inspira Fernando como Arubiano cu soñonan grandi.

Fernando no ta usa su plataforma solamente pa entretene, pero tambe pa logra cambianan social. Ela sirbi como buddy pa yuda hubentudnan na desaroya nan meta y a organisa e Good Vibes Dinner pa hubentudnan ku a huy for di nan pais. Tambe el a apoya e peticion pa haci Keti Koti un dia nacional. Durante e movecion di Black Lives Matter, ela haci un yamada pa igualdad y hustisia social. Tur esaki ta muestra ku Fernando no ta solamente un DJ, pero tambe un persona cu ta busca un mundo mas husto.

Riba e pregunta kico e ta spera di futuro, pa Fernando esaki ta un cuminsamento nobo. E ta compromete pa sigui descubri talento, conta historia inspirante y hasi e impacto positivamente den comunidad. Su mision den radio y cu cultura ta continua y su palabra preferi ta: "Esaki ta solamente e cuminsamento."

Un parti esencial di e mision di Fernando ta duna artistanan di e islanan Caribense mas visibilidat. Su raisnan Arubano ta duna un conexion profundo cu cultura Caribense. Artista manera JEON, Ataniro, Kilate Tesla, Mosta Man y Ir Sais a bira grandi danki na su empuhe.

Cu su plataforma NandoLeaks, ela logra construi un brug entre cultura Caribense y e mercado global. Artistanan internacional manera J Balvin, Davido y Ryan Leslie tambe a logra alcanza un publiko mas amplio danki na su dedicacion. Fernando ta segura cu musica y cultura di e islanan por briya na un nivel mundial.



Gabinete Wever-Croes

Murayanan na San Nicolas, cu un tempo tawata silencioso y senciyo, a bira inspiracion pa creatividad dinamico di varios artista. Cada arte di muraya ta un celebracion di diversidad, cultura y union, dunando bida na murayanan y transforma nan den obranan maestro.

2024

AÑA DI STABILIDAD Y PROSPERIDAD